

洪恩靈濟真君事實

御製靈濟宮碑

朕惟自古英賢 生為名臣 著芘民之功 沒為明神 贊天地之  
化 鼓動流盪 行乎兩間 以蔭福斯民 禦災捍患 欽枯吹生 濯  
濯洋洋 如其上 如其左右者 非智慮所得而測也 詩曰神  
之格思 不可度思 矧可射思 其此之謂歟 惟 九天金闕明道達  
德大仙顯靈溥濟真人江王 九天玉闕宣化扶教上仙昭靈博濟真人饒  
王 其功德充溢 蓋若是已 神南唐之胄 生有民社之勳 沒錄仙  
班之籍 伯仲齊美 華萼聯芳 領職上天 耀靈下土 呼吸感應  
電邁風行 下民是冒 父母其依 慈祥仁愛 物賴以寧 乃者朕躬  
弗豫 用藥百計 罔底于效 神默運精靈 翊衛朕躬 頃刻弗違  
隨叩隨應 屢顯明徵 施以靈符 天醫妙藥 使殆而復安 仆而復  
起 有回生之功 恩惠博矣盛矣 朕揆德涼薄 何由獲茲 永懷神  
德 曷其能忘 海深嶽峻 其焉有極 蓋有功必報 國之恆典 是  
用祝冊 加封神號 伯曰清微洞玄沖虛妙感慈惠護國庇民洪恩真  
君 仲曰高明弘靜沖湛妙應仁惠輔國祐民洪恩真君 舊號俱如故

洪恩靈濟真君事實

清微藏書閣

大新廟宇 亢爽軒豁 稱神所棲 爰敕有司 虔潔香火 春秋祭  
祀 歲易時衣 給灑掃五戶 表朕悃悞 答神鴻休 雖然神功之厚  
而報賚之薄 神固無責於報否 在朕心有不能已矣 夫天地之德  
曰生 神體天地之道 弼亮化機 出幽入明 翕張歛忽 遨遊太清  
監觀四方 濟利群生 功在霄壤 昭昭若此 固有不可得而名言  
者 乃彰神績 勒于貞石 樹之于廟 垂示無窮 並系以詩曰

天產英靈為世傑 出入幽明猶一覘  
生著勲勞保甌粵 沒為明神崇偉烈  
芒芒海甸倚芑樾 雨暘寒燠調以制  
冬無凌兢夏無暍 沴氣遠殄靡颺颺  
下稔高黍歲穰桀 驅拂不祥走祲蠱  
晨鍾暮鼓樂髻耄 卓彼鰲峰峻且巖  
蜿蜒回抱天造設 春蘭薦芳秋鞠秘  
寒泉白石漱清潔 神之遊兮羽葆翳  
飛雲翩翩導幢節 歛來忽往靈僊僊  
呼吸響應速以偈 濟利溥博無時悞

四時報享繁獻醊 衛朕之功疇與埒  
惟矢銘心與刻骨 書恩著德勒堅碣  
垂示萬古昭日月

永樂十五年五月初一日

二真成仙

徐知證系出偃王之後 五代時南唐人 與其弟知諤 並英邁絕倫 寬仁愛物 忠君孝親 崇信三寶 同心好善 精勤至道 修齋設醮 日常持誦玉皇真經並寶號 兄弟俱事吳 其後知證封江王 知諤封饒王 鎮金陵 戰守有備 撫輯流亡 控扼二十餘州 氓征就寬 軍給以饒 林蠻洞蠻 守條死要 稚耄嬉遊 連手歌謳 上無所怨 下無所讎 江南之民 舉賴以安 後奉命帥師攻閩 恐良善荼毒 乃發至願 每五更望北拜斗 早膳恆素食 祈殄兵革 所至勞來 百姓諸郡 望風以城降 父老簞食壺漿 擁道迎之 次峽江 有潰卒數百 阻山為亂 立命殲其渠魁 餘卒棄甲呼舞 不戰而收 民皆安堵 雖田園蔬稻 一無所犯 乃相謀曰 此吾復生之父母也 立祠於鼇峰以祀之

洪恩靈濟真君事實

清微藏書閣

未幾 兄弟相繼仙去 遂為斗中都水使者 出入天宮 積行累功 默佑下民 俾人皆盡忠行孝 崇信三寶 遇歲旱 民禱祠下 祠前潭水深不可測 俄有靈蛇出 蜿蜒于几案間 色如丹砂 雲起潭面 竟日不收 詰旦果雨 歲大熟 一日 潢溪霖潦暴溢 田稼墊溺 眾方狼顧失色 忽見有役夫千群 競操畚鍤 疏其源 決其流 水竟不為民害 已而俱失所在 乃神兵也 滄峽灘石峻嶮 舟船上下失勢 水工叫呼祈佑 感雲中有黃旗隱隱 即帖然無虞 凡民居有不戒于火者 有蝗蝻傷其稼者 叩之 則反風滅火蝗輒飛去 又為符藥以施人 凡嬰疾弗愈者服之 無不立效 祈子息者服之 即得嗣續蕃昌 由是民安物阜 田里晏然 閩人劉彝守桂州交趾 蠻賊寇邊 陷欽連等州 彝震懼 莫知所為 齋戒默禱 賊果潰去 其後韓世忠戰大儀鎮 吳玠戰和尚原 俱遣將士衛國 效八公山草木之靈 使敵遙見旗纛旌麾飛揚 山谷鐵騎百萬 行陣嚴肅 鉦鼓之聲震動原野 不待交兵 而已敗北 靈蹟顯異 不可備述 一日 黃籙齋進 忽聞天樂鳴空 祥雲環遶 仙官導從 甚都乃感 天帝遣神人頒誥 封江王為九天金闕明道達德大仙顯靈溥濟

真人 主管上清天文院 便宜行事 行文昌司祿上宰僉書天機省事  
妻涇國夫人許氏 順助仁惠仙姑 兼管太乙延生右真司事 饒王為  
九天玉闕宣化扶教上仙昭靈博濟真人 主管下元地府諸司 便宜行  
事 權南極注生上相僉書雷霆玄省事 妻衛國夫人陶氏 善助慈懿  
仙姑 兼管元皇北陰注生司事 仍封父忠武真人 母仁壽仙妃  
比者 朕躬邁疾 默運化機 大闡靈貺 翊衛左右 頃刻不離  
施以靈符 濟以天醫妙藥 隨言隨效 感應如響 使困敝之體 既  
危而即安 沉痾之疾 盡脫而復舊 斡旋之力 同於更生 感神之  
惠 銘刻不忘 是用祝冊 加封伯曰清微洞玄沖虛妙感慈惠護國庇  
民洪恩真君 涇國夫人加封貞應仙妃 仲曰高明弘靜沖湛妙應仁惠  
輔國佑民洪恩真君 衛國夫人加封恭靜仙妃 神父曰翊亮真君 神  
母曰淑善仙妃 舊號俱如故 大新闢地祠宇 又於京都建立行祠以  
安神棲 特敕所司 嚴奉祀焉  
夫為人臣 而功施社稷 澤被生民者 必生為英傑 死為明神  
雖百世之下 福佑生靈 陰翊皇化 觀知證 知諤 以世胄之裔  
事主季世 乃能靖難一方 保全其民 既攻闔中 按甲入境 首

## 洪恩靈濟真君事實

清微藏書閣

除亂兵 脫民鋒鏑之慘 措之衽席之安 是以人心感激 靡克報稱  
乃立生祠以祀之 逮其仙去 禦大災 捍大患 使民無凶荒疵癘  
之憂 遂休養生息之樂 功成行滿 上感天心 錫號真人 敘列仙  
品比者 幹運化機 大闡靈貺 愈疾朕躬 是用加以徽號 新其祠  
宇虔奉享祀 以答神休 斯皆累積陰功之所致 故昭昭不朽 與天  
地相為悠久 夫豈偶然而已哉

詩曰

事親盡孝事君忠 華萼聯芳孰與同  
更復精勤修至道 並分茅土受王封

又

當年駐節向金陵 萬里江南不識兵  
師入七閩人按堵 幾多福澤在生靈

又

歲旱靈潭起蟄龍 大施霖雨作年豐  
潢溪水落民無患 滄峽舟船險更通

又

蝗無傷稼火無過 田野均蒙惠澤多  
遍給靈符蕃子息 更能愈疾起沈痾

又

桂郡揚靈卻寇蠻 現奇更效八公山  
神兵百萬填山谷 頓解重圍頃刻間

又

靈符妙藥出天醫 翊衛微躬不暫離  
起疾神功難報稱 再生感惠此心知

又

隨聲應感不移時 幹運功參造化機  
馭氣乘風遊八極 天宮陟降闡靈威

又

生為名將建高勳 行滿成仙福有因  
京國鼇峰長廟食 丹書錫號證天真

又

威靈濯濯更洋洋 衛國安民績愈彰

## 洪恩靈濟真君事實

清微藏書閣

不獨聲名昭日月 永同地久與天長

### 保奏真君文

金闕侍中行九靈飛步章奏節制雷霆臣王謹奏 臣切謂道在無極  
之始 冥冥杳杳 不識不知 非心思計慮之所能也 自天真皇人紫  
筆定書 然後學道者 得以探其源洩其流 撰成科典靈文耳 目斯  
世今有神焉 以修齋執戒為功 以度死濟生為誓 發為文辭 合於  
科典 凡曰長材秀民者 莫不交口誦之 其可稽於徹聞乎 切見九  
天金闕真人徐知證 九天玉闕真人徐知諤 聲名冠世 功德在民  
內察其行 外觀其跡 委是骨像合仙 有心積善建功 篤好三寶之  
士 若非宿幸因緣窮神而知化者 孰能如此 所著九真妙戒化文  
九嶽神燈科格 三界科保馬 科並出於太上玄言 究微摘實 自然  
成章 靈音嘯詠 可以為浩劫津梁 所謂閉門造車者 不計其歲月  
矣 外有靈濟醮科 本願儀文 七政燈科 自非敢以為己功 從民  
請也 臣性識疏愚 為言輕賤 考事察能 詮補職任 躋進仙階  
今欲望聖慈允俞所奏 再將臣徐知證等所撰科典翻行 三界合屬去  
處 各請遵稟 照驗施行 不惟顯靈濟濟度之功 亦足以張吾軍而

慰民心之所望也

伏候  
指揮

洪恩靈濟真君事實竟

天運壬辰年辰月正一天師清微弟子洪鼎堅羅大英恭錄彙編  
蔣科靜複校

洪恩靈濟真君事實

清微藏書閣